

日本紀舒明天皇九年二月十一日大星從東流西便有音似雷僧旻曰非流星是天狗也其歲有蝦夷兵萬寶全書云流星東向西移來日雨東向南移來日火東向北移七日內有人報寇盜南向東移主旱南向北移來日霧西向東移二日內主風西向南當年水旱災傷西向北移來日風雨大作北向東移霖雨北向南移來日陰無雨按流星太抵如星白色其跡微白光引故雖名星非星其光一瞬之間無定形皆天火之屬也兒女見之則爲鼠鳴咒之未知其據和名與波比星呼喚之義乎其他如天狗奔星梁星等非常者俗曰光物多爲凶變之表

〔日本書紀舒明二十三年〕九年二月戊寅大星從東流西便有音似雷時人曰流星之音亦曰地雷於是僧旻曰非流星是天狗也其吠聲似雷耳

〔史記二十七〕天鼓有音如雷非雷音在地而下及地其所往者兵發其下

天狗狀如大奔星孟康曰星有尾旁有短彗下有聲其下止地類狗所墮及炎火索隱曰望之如火光

炎炎衝天其下圓如數頃田處上發者則有黃色千里破軍殺將

〔續日本紀聖武十〕神龜五年九月壬戌夜流星長可二丈餘光照赤四斷散墮宮中

〔續日本紀光仁三十四〕寶龜七年二月甲子是夜有流星其大如盆

〔續日本後紀仁明十七〕承和十四年十一月壬午人定之時有如流星者自西殞東其光赤廣○赤廣一本作光芒二町餘長十許丈

〔續日本後紀仁明二十〕嘉祥三年正月己酉有如流星者經天落東其大如月光色赤青

〔文德實錄一〕嘉祥三年六月丙寅有流星頭尾轉行

〔文德實錄三〕仁壽元年正月癸卯是夜有流星大如斗餘光久之乃滅

〔文德實錄十〕天安二年五月丁亥夜有流星入天○天一本作巨恐長一丈許六月己亥夜有如流星

者經天西落大如月光青赤其後西方空中有聲如雷二度